


吳郡西山訪古記
署于友任

地750.22
179.95



吳郡西門
訪古新

騰衝李曰瑛署

版藏蘇州封
門曲石精廬

吳郡西山訪古記序

騰越李君印泉以滇南奇傑爲吳下賓萌胥疏江湖蟬
蛻塵滓循咳絜養補廣微之詩涉園自娛開泉明之徑
琴樽高會花鳥助其發皇裙屐相要漁樵相爲唱和陶
陶然不知其爲故將軍眞宰相焉君神觀聰強精力殊
絕凡輶車所歷斥候所經營慕畢秋帆阮芸臺之爲人
搜剔貞珉提倡風雅神遊造化足徧名山文采炤於巖
阿芬芳溢於蘭芷比者脫離塵網汗漫滄江瞻古德之
道場訪名賢之祠墓鬼神感靈而來告者獻斂手而交
推成吳郡西山訪古記四卷夫孫興公之遐想祇在山

吳郡西山訪古記

序

一

游羊叔子之雅懷惟耽嶺眺不過流連光景撫拾芬華
君則苔徑所經必探夫貞石芒鞋徧踏痛恨乎發邱樹
坊表於鄭公之鄉禁樵采於展禽之壟攀藤捫葛補方
志之闕遺斷碣殘碑披沈霾之姓字遂使吳中文獻昭
若發矇古代衣冠望而羅拜凡斯風義可格人天僕少
長里閭習聞風土念桑梓敬恭之訓數典滋慙歷枌榆
游釣之鄉執鞭欣慕匪特藝林之淵滙抑亦掌故之琳
瑯已敢疏崖略以諭方來民國十五年丙寅冬至後十
日張一麀

吳郡西山訪古記序

曲石李公挂冠隱吳門時芒屨携短童徒步數十里蒐
貞石尋廢寺瞻拜先賢塚墓以是胸中掌故比吳郡諸
老宿尤爲翔實乙丑之夏余避暑耦園公乃長嘯入吾
廬因披襟踞胡牀把酒談論移晷余聞曲石名以爲其
人大河喬嶽深阻難量顧簡易諧謔如老名士居常自
忖以爲異先是癸甲之交余結吳門諸賢爲消寒飲是
歲仲冬公遂題名入社公屢欲跡清代經師惠定宇紅
豆山莊故址余言在今唐家坊聞紅豆猶存數威一作
花亦未之往求也於時燕趙齊楚之郊戎馬縱橫中原
無主或者議迎黃陂正法統黃陂朝入都暮必以公正

吳郡西山訪古記

序

二

揆席公顧然不問外事日對客飲醇酒評量書畫金
石丙寅暮春余旣遷宅新橋巷牡丹紫藤方大花宅故
經師陳碩甫祖第碩甫名亞惠氏乃邀公觴飲門者以
公遊鄧尉辭兩旬不返客有笑而言曰久蟄者思啓久
懣者思噓尺蠖之屈所以求伸公之不能忘情於用世
也其將微服以赴津門乎或信之或疑之一日余復結
諸賢爲獅林餞春之飲題詩未半而公掀髯排闥入室
手一冊示座人蓋公之載酒買艇挾兩健僕而西也太
夫人亦不之知荒山破寺披榛叢剔蘚蹟甄錄宋以來
石刻無遺歷訪先賢兆域百餘所憑弔其松楸而徘徊

其綽楔其或幽隱芒昧則諮於亭長野老證以史志相
其陰陽間得佚石於畦隴閒於是韓襄毅徐武功董香
光錢湘舫王惕甫曹貞秀夫婦諸墓近百年來文人學
士課虛叩寂於荒陁窮谷繭足不知其所往一旦骨脈
呈露昭晰無疑其尤久且遠如吳朱桓梁陸雲公錢氏
元璟佳城幽壤縣歷紀祚亦復披豁以詔當世公之功
於是爲勤公於經師定宇之墓入鄧尉往返三求他如
范文穆吳文定都元敬祝京兆周天球姜貞文蒼雪禪
師諸埋魂塵骨之地皆蒼煙蔓草邱壠平而碑誌磨滅
吳都二公尤疑守護者乘子孫之彫落發塚而售地與

吳郡西山訪古記

序

三

人其迹猶可推也拊膺悲歎誓他日贏糧襍被重入西
山以發其覆而於一代經師惠定宇之墓尤耿耿若膺
巨疚負重責期於必護余因謂公段金沙之沒焉葬於
虎阜虎阜去城咫尺今疇諮故老無以指其處唐子畏
之友張夢晉與崔瑩爲情死子畏爲之合葬於玄墓山
中山中之人不知也公旣攄懷舊之蓄念發思古之幽
情精誠感通鬼神必將來告西山之遊都二十日凡登
陟訪問櫛沐之艱且劬備於記爲二卷公在滇南旣徧
求前賢窳窳之地而表之官於粵曲江之墓賴公以顯
於世釐剔其侵地修復而供祭掃焉人之好古者摺文

考獻以求娛悅公乃敝筋骸劇心慮旅食所至必盡取
古人藏形之兆而封拜之使來者必敬必式苟長逝者
而有靈九泉之下其將感涕而無以爲報耶公曰子宜
爲我序因撮其顛卒以告吳中士大夫庶幾其能繼公
而起焉丙寅孟夏吳江金天羽

吳郡西山訪古記序

吳郡西山訪古記四卷都六萬餘言騰衝雪生李君丙
寅春暮至夏初二十餘日中往遊吳郡西山所記也其
游以訪山中祠墓碑碣爲幟志名人淹佚之墓多剔榛
莽而始得之又亟慨山岷爲人守墓者欺隱盜賣平冢

吳郡西山訪古記

序

四

抉石之無狀不惜垂涕泣而道之懿夫仁人君子之用
心也慨自冢人墓大夫之職廢雖防護之禁上宣而下
率悖之是在爲子孫者與其地之賢士大夫隨時加之
意而已雪生曩在滇修大理洪武中大軍封邱昆明孫
清愍傅忠壯祿豐王文毅諸墓於清愍且爲之立碑在
嶺南修曲江張文獻墓祠所爲視此者未易一一數也
良由仁心義尙觸發秉彝非有所爲而爲而猶有譏雪
生爲好名者吾不知其何心近歲滇會西山有游僧踵
楊璉真伽故轍當事若罔聞知物議譁然則且爲之辯
護嗟呼人心之不同誠如其面而雪生侷乎遠矣丙寅

六月六日石禪老人趙藩書於昆明東華別墅之詩境
軒

吳郡西山訪古記序

自段氏毀法釀亂亂以浸長警告頻申充耳不聞越歲
丙寅燕趙齊楚戎馬徧郊而生民之禍亟矣吾友李子
印泉以手創共和之人今乃退隱吳門天心其未厭亂
乎雖然豪傑有爲之士絕不隨氣數以銷沈而置斯世
斯民於不顧故必隨地有以自見莫不關於人心風俗
足以觀感興起者非僅如文人墨客之嘯傲登臨販賣
骨董之蒐討故實已也印泉茲以其吳郡西山訪古記

吳郡西山訪古記

序

五

四卷問序於予予閱盡而喟然曰吳俗掘墓之慘乃至
於是乎仁人孝子將何所措其親乎木本水源之思不
幾窮乎今得印泉是記爲之發伏摘奸庶冀人心之一
悟末俗之一改也夫君子不以天下儉其親凡可自致
者宜無弗致也乃有坊表則摧之有石獸則仆之
有碑碣則斷之磨之棺則劈之骨則暴之斲坊頭鼻屨
以基墻輦圍石方磚以砌路凡所以殘毀夷滅之者無
不至死者何辜遭此荼毒嗜其甚矣繚彼墳客斷其脰
磔其軀不足以蔽其罪吾嘗聞昏夜盜塚者矣茲乃白
晝集眾明目張膽而爲之名賢勝蹟悍然剗削他更何

論魑魅魍魎恣肆橫行於天日下吁不其異歟周禮冢人掌於地官誠重之也比長閭胥師族黨正皆鄉大夫以佐治而宣教禁奸者也今皆亡矣曾子曰上失其道民散久矣方望溪先生謂朋友散無講習宗族散無親睦邱墓散無祭埽今吳中邱墓豈止散焉已乎是大罪重戮又不僅在墳客也他如柩淹不葬道穢不除斂財信邪諸敝俗皆爲民害能如印泉所記剔釐革正皆導迎善氣消彌劫運此其確矢矣邦人士曷急起而圖之浮屠經三宿者卽戀戀有情予於甲子癸亥間主印泉廡廬者年餘今故就是事而極論之以譖吳中士夫之

吳郡西山訪古記

序

六

讀是記者印泉心契往哲精誠所積鬼神來告今所訪而未得者終將有得之之日況觀感興起者之必有人乎至謂徐文靖宜從明諡俟齋不宜入清志陳僖敏子孫宜絕徐有貞皆正論凜然有裨風教云中華民國十五年丙寅夏五月旣望友生孫光庭序於京師淨業湖寓齋

吳郡西山訪古記序

吾聞之登山臨水抒寫其胸中之獨得發爲文章以備拾遺訂墜撈奇剔異之資固文人韻士不得意有託而逃之所爲而非所論於退隱之賢豪也然而賢豪者流

聲光愈遠則人之耳目之也愈眾揣測之也亦愈奇往
往蟄居寓廬而消息傳來行踪僕僕爲政治而奔走談
之稿鑿如目見者然殊不知鴻鵠已翔於廖廓而猶求
尺鷃於枳棘之間不亦淺之乎視吾曲石哉曲石於同
人消寒九集後忽動遊興拏舟往天平鄧尉支硎穹窿
天池堯峰諸山探奇訪古凡二十餘日歸而適值獅林
餞春之會遂出遊記一編見示都六萬餘言姑無論其
攷訂方志搜求碑窟以冀保存古名賢之邱壠功不在
掩埋齟齬下卽此曠觀遐矚優遊於山顛水涯以寄其
愴然物外之情真識時務之賢豪哉此編出爲耳目之

吳郡西山訪古記

序

七

揣測之者夫亦可以少息焉矣則謂曲石之與文人韻
士不得意有託而逃之所爲異耶否耶吾不敢知而曲
石自此遠矣民國十五年夏正五月吳縣亢惟恭拜序
謁郝將軍李中丞墓記書後

晉寧方臞仙同學來余齋見雪生兩寄遊記大韙之因
言明季晉寧郝將軍清李中丞皆殉葬吳郡而地趾未
詳乞書託其親訪而詳示之將以載入邑志余書去未
幾而雪生此記來讀之狂喜將軍有戰功而以節死中
丞有政績而以讒隕英靈不沒固宜得雪生而彰闡之
而雪生義尙之勇又豈今世所易得哉至扶植李氏孀

孤則尤義精而仁至矣合江李紫璈大令故雅才循吏
與余亦有舊觀其立碑種樹培護郝墓謂世變方亟恐
異日遂無此人言之沈痛今竟驗矣悲夫鶴峰先生之
冤獄昔侍先贈公竊聞緒論亦謂爲和珅所傾陷考滿
漢名臣傳中李因培傳其辭仍多所諱雪生得事實於
何種記載尤盼具鈔示我當別立一傳以傳鄉先輩之
真相倘亦雪生所樂聞者余且日望之矣爰走筆而率
書於記後丙寅大雪節趙藩書於昆明東華別墅之陶
陶齋

吳郡西山訪古記跋

吳郡西山訪古記

跋

八

清光緒丁戊間留學北京時獲讀雲南雜志刊載之滇
中掌故及鄉先正詩文詢知均騰越李印泉先生所采
輯特心儀之迨己酉歸滇供職圖書館始識先生面見
先生於教育軍事之餘凡鄉先正之遺箸軼墨祠宇邱
墓或輯刻之修葺之抑或捐貲收歸館儲裨益鄉邦已
難指數逮入民國戎馬倉皇仍未稍輟毅力精心令人
傾服近年息影吳門更進而從國故之採訪凡有所
得輒貽滇館今歲秋間寄自箸中先後訪古記四卷
就正石禪虛齋兩師因得瀏覽一過愈服攷證精審記
載翔實尤以訪獲楊文襄郝將軍李鶴峰中丞累代邱

墓及蒼公舍利塔於滇事極有關係智素亦愛古成癖不禁狂喜弗已晚近歐美人士探險訪古不遺餘力誠以於科學有所發明也吾國人鮮事講求千年文物每多棄遺流出國外深爲可惜先生作記之用心洵足以楷模全國昭示來茲智以嚮往日久敬綴數語一以識先生愛重前哲之雅固非近賢所可企及一以自勗仰慕先生當知所景行而不可但騰口舌云爾丙寅長至前六日昆明何秉智謹跋於雲南圖書館

吳郡西山訪古記跋

騰衝印泉李先生解閣揆後僑寓蘇州之葑門闢圃詩

吳郡西山訪古記

跋

九

花奉母讀書與海內之賢士大夫游以文字相酬酢其於梓桑也近師矜堪師遺法楊文襄仕止久速以時而不苟其趣尙之高迥越恆流萬萬余嘗肅然敬之而非阿其所好也先生讀書之暇訪古吳郡撰成一編爲有吳士大夫所不及知者而先生均訪獲而表章之而於吾鄉先賢尤殷殷致意登中峰訪蒼雪法師塏往鎮江訪楊文襄公墓屢於矜師頻羅室中獲讀其所記憾不策杖相從一抒牲醴之忱也欣慕之餘迺以晉寧有郝將軍李中丞墓均在蘇州丐師致先生書訪求紀述以光吾邑余亦附啓伸意先生接書後於郝將軍匪惟訪

獲其墓前訪獲其實藥處於李中丞先訪獲其後裔孀婦孤子命之爲導得遍謁其祖孫六世墓墓石之被竊賣者縣令守塚人償砌而於孤孀尤加意憫恤冀輔其成人以延中丞一線之嗣沒者得以闡彰生者賴以援助此其義尙我滇人當感慕之豈獨晉邑已哉嗚呼如先生者洵所謂身心兩遊交盡者矣當先生訪李墓之日余亦偕澄甫和甫允三小泉諸君侍斲堪惺盦兩師重遊盤龍萬松遊歸後十日獲讀其訪稿亟收入邑乘欣然而跋其後以告鄉人之眞愛滇者勿徒作口頭禪而行則病滇禍滇令天下齒冷哉丙寅冬月十日晉寧吳郡西山訪古記

跋

十

方樹梅臞仙敬跋於滇垣述古書堂之師齋

讀吳郡西山訪古記書後

託地西南擎天東北經營乎八表洋溢乎九垓斯有志之士所願執鞭弭出而與世周旋者也乃神器方傳揖讓而市人不絕內鬩豈天命之難諶抑人謀之未善將挽狂瀾之倒益歎治絲之勢斯又自好之士相與慨歎而僥焉如不終日者也於是詹尹端龜屈原釋策李邕識面王翰卜鄰開解水之草堂歸愚退隱拓鷗波之故宅淵雅著書吳郡一大都會揚子環其左具區瀦其右其民涵濡讓德無忤無爭砥礪廉隅有典有則所不能

勝者叱咤風雲鞭笞鸞鳳與燕趙健兒奔逐中原耳然
震以恐致福乾以惕无咎殫心周孔掩耳桓文識者躓
焉夫馳聲海外徧跡寰中亦何在不可居朱邑之鄉稅
王尼之駕不於關隴河洛三湘兩粵而於吳夫吳郡西
鄉多山絲枲竹箭尤盛林深箐密霞蔚雲蒸讀有道之
碑式商容之墓披荆斬棘攀葛捫蘿洵古今人表之談
叢亦湖海文傳所未逮歲丙寅訖己巳扁舟一葉容與
乎中流蠟屐幾緉逍遙乎絕頂庶幾春秋知我毋爲巢
許笑人凡爲時若干日登山若干處表彰塚碣若干人
成書若干卷詳於記五百名賢滄浪畫象訪古之記各

吳郡西山訪古記

書後

十一

有千秋矣民國十八年己巳九月彭毅孫謹識

題辭

曲石先生以近著吳郡西山訪古記賜讀漫題小

詩兩章希有道是正

吳縣 吳蔭培 穎芝

濁世不可居山林締知己一生好游山古有謫仙李吾
曹甘石隱放浪頗自喜著屐效阮孚攝衣從蘇子涉巖
必升頂探洞每窮底結習彼此同神州行萬里吳郊西
望遠羣嵐拔地起北踏箭缺峰南眺具區水路絕風雲
通春深林壑美謝監作山賊貪游不知止相約賦登高
望古縱遐企

古人不我見尚友懷千秋名山鬱佳氣到處瞻松楸朱

吳郡西山訪古記

題詞

一

墩吳侍中元墓宋青州舉一可例百故國尋荒邱大雅
久不作遺型猶可求橫山北邙道結伴逍遙游世衰陵
谷變誠至金石留雷雨弗迷麓神鬼能通幽謂近日結
伴冒雨入
山訪墓得碣誌 並
曲石舟中夢兆事 達人銳進取巖穴拌窮搜蟲沙慨
時局雞酒聯朋儔共攜濟勝具吾生未行休

奉題曲石閣揆西山訪古記

吳縣 彭清鵬 雲伯

好善優天下吾聞子輿言讀公記游作惻悱識心源昔
賢久寂滅樵牧荒丘墟此何預人事搜訪躬其煩或謂
據幽情聊慰往代魂不然市駿骨藉昭國士恩凡茲管

蠡測未知公所存休休方寸地造次同春温九原歸隨
會百世思楚元匪曰以示惠中情不可諉芝蘭等臭味
葛藟庇本根區區一編書足覘德業尊古來雜地志作
者不乏人昌平山水記先後堪比倫嶺表錄異物洛陽
述名園徒誇巨麗觀彼哉安足論

印老示我游記一編其訪吳中先賢冢域可謂勤

矣感而有作

吳江費樹蔚 韋齋

老去尋山報國恩

此不知何人詩左文襄每喜誦之

古人懷哀何清壯

李公避喧迥殊俗杖策荒山問幽壙吳兒足跡不能到
白楊叢莽森在望陰風慘澹狐兔窟崩崖綻裂蝮虵藏

吳郡西山訪古記

題詞

二

豈知中有槃槃翁鐘漏既歇天所放當時漆燈照山明
今日麥飯無人餉仆碑斷壘作奇貨山賊傳心成業尙
對此茫茫心骨悲歎息王孫勅倮葬英賢名姓猶翳如
何況富貴來以儻李公精誠感鬼物尸氣觸臭神彌王
夜來大聲撼枕起似有千夫浩譟唱一人鞞袍跨雲立
鬚髮颯爽偉然狀導公經行不知處既寤復夢今未忘
意者其徐文靖歟曠代論交丈人行

印老訪侯齋先生父墓之夕兩夢所

見如此疑紅袍人爲侯齋父文靖公也印翁十世祖鍾

英府君亦明遺臣故于侯齋尤致虔焉此節爲記中所

無印老告叩虛發寂他亦勤胼胝知費屐幾緡後來弔
古庶有徵所求未得輒愴悵

尋范文穆吳文定諸公墓不得而以惠定字墓屢訪

晉然尤引為恨真宰上訴天應泣成霸才銷鑠為漫浪羣龍無

首正此時近游兼旬人謂誑時合肥遊荒或議迎黃陂

出遊兩旬不歸吳人疑其歸成此編示坐客始知公真

我豈妄安心是藥閒是福絕倒槐宮取卿相烈士名心

磨不盡記取穿塚要離傍梁鴻百年一坏我與公隻雞

斗酒誰來訪

敬題印泉先生吳郡西山訪古記

吳江周麟書 迦陵

天下駿馬善馳突追風逐電不可勒天下俊人愛遊逸
梯山航海不可測我愛長安李謫仙不為宰相為逋客

吳郡西山訪古記

題辭

三

鳶肩鶴體龍虎姿騰踔中原不世出昔曾洗甲挽天河

今復乘槎泛笠澤何止平原十日遊恨不南溟六月息

歸來示我書一編吳中山水儘流連擔囊躡屩追白日

追籐拾級捫青天三萬六頃視掌上七十二峰羅眼前

側身天地一長嘯呼吸湖光餐岫煙歎息玄墓久荒廢

澗上草堂復何在竭來重上漁洋山石樓銅井空相對

只餘蕭寺志猶存數典忘祖徒滋愧九世從祖安期公

藏寺況復中經變故多鄉邦文獻憑誰載君忘跋涉恣

遨遊殘山剩水勤討搜香光荒塚待發見漁洋山董香

得蒼茫還泛范蠡舟書生閉戶苦咕嚕對此能不掩面

羞讀君遊草寄君語寄君語當游草序方今民力正凋
傷帶甲環戈塞寰宇誰恤饑寒到雁鴻空教搶攘鬪狐
鼠婆娑風月君自娛整頓乾坤吾誰與勸君莫便臥東
山應念蒼生望霖雨

讀印泉家弟西山訪古記

騰衝李學詩 希白

雪生好與古爲徒博網宏羅日不足一笠一僕一襍囊
短衣芒屨戴星出朝發胥江棹暮向穹窿宿纔上陽山
巔又到支硎麓墟里殷勤詢野老荒山改顏問樵牧剖
苔剔蘚認殘碑某氏某名親記錄誓宣潛德發幽光肯
吳郡西山訪古記

題辭

四

教一字遭湮沒或爲表樹或加封或訪其後蒸嘗續幽
秘洩盡山靈驚精神到處鬼神告吳中好古亦多人忽
焉聞之瞠其目知君此游具深心謾道陶情玩水木

安甯楊文襄公僑家京口呈貢蒼雪大師示寂中
峰近雪生弟訪其宅第墓塋各有紀載誠愛瀕
景賢之盛心也賦詩美之

劍川趙藩 樾村

僕指朱明一代雄儒臣衲子抗瀕宗隱猶憂國吟蒼雪
徙不忘鄉勝石淙丁卯橋荒遺故第甲申變劇老中峰
重君訪墓尋碑意恨不吳門共策筇